

Na osnovu člana 17. Zakona o Vijeću ministara Bosne i Hercegovine („Službeni glasnik BiH“ br. 30/03, 42/03, 81/06, 76/07, 81/07, 94/07 i 24/08), a u vezi člana 2. Zakona o primjeni određenih privremenih mjera radi efikasne provedbe mandata Međunarodnog krivičnog suda za bivšu Jugoslaviju, te drugih međunarodnih restriktivnih mjera („Službeni glasnik BiH“, broj 25/06), Vijeće ministara Bosne i Hercegovine, na 64. sjednici održanoj 14.07.2016. godine, donijelo je

ODLUKU O
PROVOĐENJU REZOLUCIJE 2231 (2015)
VIJEĆA SIGURNOSTI UJEDINJENIH NARODA

Član 1.
(Predmet Odluke)

(1) Ovom Odlukom utvrđuje se način i procedure provedbe Rezolucije Vijeća sigurnosti Ujedinjenih naroda 2231 (2015), (u daljnjem tekstu: Rezolucija).

(2) Odlukom iz stava (1) uvode se sljedeće restrikcije:

a) Finansijske restrikcije podrazumijevaju zamrzavanje bez odlaganja fondova i drugih finansijskih ili ekonomskih sredstava uključujući sredstva koja potiču od imovine u vlasništvu osoba sa Popisa osoba uspostavljenog po Rezoluciji, (u daljnjem tekstu: Popis) ili su pod njihovim direktnim ili indirektnim nadzorom ili pod nadzorom osoba koje nastupaju u njihovo ime ili prema njihovim uputama, ili te osobe djeluju u svojstvu njihovog sukcesora;

b) Restrikcije ulaska i tranzita preko teritorija Bosne i Hercegovine podrazumijeva zabranu ulaska osobama sa Popisa na teritorij Bosne i Hercegovine, kao i tranzita preko teritorija Bosne i Hercegovine;

c) Pribavljanje odobrenja Vijeća sigurnosti Ujedinjenih naroda (u daljnjem tekstu: VSUN) podrazumijeva obaveznu aktivnost prilikom svakog direktnog i indirektnog snadbjevanja, prodaje ili transport roba pod posebnim režimom, srodnih materijala i rezervnih dijelova koji se mogu dovesti u vezu sa robama pod posebnim režimom.

Član 2.
(Značenje izraza)

Pojedini izrazi upotrijebljeni u ovoj Odluci imaju sljedeće značenje:

a) Popis podrazumjeva Popis uspostavljen Rezolucijom, a uključuje pravne i fizičke osobe, te ostale subjekte koji su predmet restrikcija utvrđenih čl. 3. i 4. ove Odluke, odnosno Rezolucijom.

b) Robe pod posebnim režimom podrazumijevaju sljedeće:

1. Konvencionalno oružje podrazumijeva sve borbene tenkove, oklopna borbena vozila, artiljerijske sisteme velikog kalibra, borbene avione, jurišne helikoptere, ratne brodove, rakete ili raketne sisteme, kao što je definisano u Registru konvencionalnog oružja UN, ili srodne materijale koji se mogu dovesti u vezu sa konvencionalnim oružjem;

2. Balističke rakete i tehnologija obuhvataju sav materijal, opremu, robe i tehnologiju iz S/2015/546;

3. Nuklearni materijal obuhvata svu opremu, robe i tehnologije iz INFCIRC/254/Rev.12/Part 1, i INFCIRC/254/rev.9/Part2 ili najnovije verzije ovih dokumenata kako ih ažurira Vijeće sigurnosti Ujedinjenih naroda, kao i svih ostalih predmeta ako nadležna tijela u Bosni i Hercegovini utvrde da bi isti mogli doprinijeti preradi ili aktivnostima koje se odnose na obogaćivanje urana ili tešku vodu i sve druge aktivnosti koje nisu u skladu sa Zajedničkim sveobuhvatnim akcionim planom (u daljem tekstu: ZSAP).

c) Pribavljanje obaveznog odobrenja od VSUN u smislu ove Odluke podrazumijeva aktivnosti koje provodi nadležno tijelo iz člana 9. tačka a) Zakona o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine ("Službeni glasnik BiH" broj 103/09).

d) Fondovi znače bilo kakvu finansijsku imovinu ili korist, kao što su:

1. gotovina, čekovi, novčana potraživanja, mjenice, platni nalozi i druga sredstva plaćanja;

2. depoziti kod finansijskih institucija ili drugih subjekata, salda na računima, potraživanja i prava koja proizlaze iz potraživanja;

3. vrijednosni papiri koji su predmet berzanske ili druge vrste prodaje, kao što su dionice ili udjeli, certifikati, obveznice i druge vrste vrijednosnih papira;

4. kamate, dividende i drugi prihodi koji proističu iz imovine;

5. kredit, pravo na kompenzaciju, garancije izvršenja i druga finansijska prava;

6. kreditna pisma, konosmani, otpremnice i zaključnice;
 7. dokumenti kojima se dokazuje interes u fondovima ili finansijskim sredstvima;
 8. svaki drugi instrument kojim se stimuliše finansiranje izvoza;
- e) Ekonomska sredstva znače svaku vrstu imovine, materijalnu i nematerijalnu, te pokretnu i nepokretnu, koja ne predstavlja fondove, ali se može koristiti za sticanje fondova, roba ili usluga.
- f) Ostali vidovi saradnje podrazumijevaju pružanje Iranu tehničke obuke, finansijskih sredstava i ulaganja kao i posredovanja ili pružanje usluga savjetovanja, ostalih usluga ili pomoći i sl. koje se odnose na uvoz, izvoz, promet, proizvodnju, eksploataciju, održavanje ili upotrebu roba pod posebnim režimom, srodne materijale uključujući i rezervne dijelove.

Član 3.

(Primjena finansijskih restrikcija)

(1) Nadležna tijela u Bosni i Hercegovini će svim osobama, grupama, privrednim subjektima i organizacijama koji su navedeni na Popisu, bez odlaganja i prethodne obavijesti, zamrznuti sve:

- a) fondove i
- b) ekonomska sredstva.

(2) Mjere navedene u stavu (1) ovoga člana primijenit će se i na one fondove i ekonomska sredstva koja potiču od imovine u vlasništvu osoba sa Popisa ili su pod njihovim direktnim ili indirektnim nadzorom ili pod nadzorom osoba koje nastupaju u njihovo ime ili prema njihovim uputstvima ili te osobe djeluju u svojstvu sukcesora. Nadalje, osigurat će se da bilo koja imovina u vlasništvu drugih osoba ne bude direktno ili indirektno dostupna za korištenje osobama sa Popisa.

(3) Nadležna tijela iz ovog člana su tijela definisana članom 12. Zakona o primjeni određenih privremenih mjera radi efikasne provedbe mandata Međunarodnog krivičnog suda za bivšu Jugoslaviju, te drugih međunarodnih restriktivnih mjera ("Službeni glasnik BiH", broj 25/06), (u daljnjem tekstu: Zakon o MKSJ).

